



”Oqaluttuarisaanitsinnut tamatta ilaavugut”

Ukiut ingerlaneri misilittakkallu amerliartortillugit Buutip paasiartuinnarpaa oqaluttuarisaanermut tupinnartumut ilaalluni.

Piffissap matuma nalaani Buutip qalipagai 18-it GrønlandsBANKENip Nuummi qullersaqarfiani nivinngarsimapput. Amerlanersaat saqqummersinneqarngaarput.qalipakkat nutaat, eqqarsaatersorfigisassat. Ilaai qangatut Buutip qalipagarai. Assiliartaliussat marluk uteqqiapput: Nanoq aamma sikorsuit, Qaqortup eqqaani kujataani peroriartorfimminit ilisimasarilluagai. Qalipakkani annerni nunat angingaatsiartuupput.

-Ilaasa eqqarsaatersorfigisassatut taarusussavaat, sikorsuilli taama isikkoqartutut isumaqarfigaakka.

Eqqarsaatersorfigisassaanersut taamaanngitsulluunniit eqqarsaatersorfiginngilluinnarpara, arnaq pilersitsiumatooq Bodil Pedersenimik atilik oqarpoq.

Buuti ukiuni qulikkaani arlalinni Kalaallit Nunaanni avataanilu eqqumiitsuliortuuvooq ilisimaneqarluartoq. 1955-imi inunngorpoq, 1982-86-imi Københavnimi Skolen for Brugskunst-imi ilinniarsimalluni. Tamatuma saniatigut Sverige-mi Savalimmiunilu ilinniaqqikkartortarsimavoq. Ukiuni arlalinni Tunumi najugaqarsimavoq.

Arnat nannullu

Nannumik nuannarinninneq Buutip eqqumiitsuliaani takussaajuarpoq. Qalipagai pingasut taaguuteqarput ”Arnaq nanorlu”, taamaalilluni inuup uumasullu qanimut ataqatigiilluarnarat arlaaligut ersersinneqartarluni.

-Oqaluttualiat nalitsinnilu arnat oqaluttuamut akuleriisittarpakka. Arnaq nanorlu arlaatigut ataqatigiipput, taamaaginnarpoq. Immaqa arnaanera peqqutigalugu. Nanoq uumasuuvooq nukittoq, annertuumik eqqarsaatinniittuuartarsimasara, eqqumiitsuliortoq oqaluttuarpoq.

Ataqatigiisitsineq uteqqiattuafiginiartuuua. Ukiut ingerlaneri misilittakkallu annertusiartorneri ilutigalugit Buutip paasiartuinnarpaa, oqaluttuarisaanermut tupinnarluinnartumut qanoq ilaatigaluni. Tamanna ilaatigut qalipakkami taartumi takuneqarsinnaavoq, takutinneqarluni Sassuma Arnaa uumasullu anersaavi qangattami issiasut. Titartagartaa eqqarsaatersuutaavoq, qangattarli pinngortitami nassaassaavoq. Taanna Tunumiippoq, Buutillu inuusukkallarami eqqarsaatigikkajuttarsimavaa, ”Sassuma Arnaa aasaanerani taamaattumi najugaqartarsimassaaq”.

-Uagut inuttut uangalu arnatut qanga pisimasunit pilersitaavugut. Tamanna upperileraluttuinnarpara.

Oqaluttuarisaanerput qangarsuarneersuuvooq. Maannarpiaannaq inuunngilagut, aammali tamatta oqaluttuarisaanitsinnut ilaavugut. Sananeqaatitta iluaniippoq, anersaatta iluaniippoq. Imaannaanngitsunit kinguaajuvugut, kinguaariillu ingerlateqqittussaavugut, Buuti oqarpoq.

Saqqummersitsineq juulip 31-ata tungaanut ingerlassaaq, aningaaseriviullu ammasarfiini takuneqarsinnaalluni.

